

# Dýrmætir ávextir Fyrstu sýnarinnar

**DIETER F. UCHTDORF FORSETI**  
annar ráðgjafi í Æðsta forsætisráðinu

**A**uppvaxtarárum mínum í Þýskalandi sótti ég kirkju víða og við mismunandi aðstæður—í fábrotnum bakherbergjum, glæsivillum og í nútíma starfræktum kapellum. Allar áttu þessar byggingar einn mikilvægan þátt sameiginlegan: Andi Guðs var þar og finna mátti ást frelsarans þegar við söfnuðumst saman sem grein eða deildarfjölskylda.

Í kapellunni í Zwickau var gamalt fótstigið orgel. Á hverjum sunnudegi var pilti falið að stíga fótstigið og fylla þannig belgina til að orgelið virkaði. Jafnvel áður en ég varð Aronsprest dæmishafi naut ég stundum þeirra forréttinda að vinna þetta mikilvæga verk.

Meðan söfnuðurinn söng hina kæru sálma endurreisnarinnar, pumpaði ég af öllum mætti svo að orgelið yrði ekki loftlaust. Augnaráð organistans sýndi svo ekki varð um villst hvort ég gerði vel eða þyrfti að gera betur. Mér fannst alltaf mikið koma til þessa mikilvæga skylduverks og þess trausts sem organistinn sýndi mér. Það var dásamleg tilfinning að hafa

þetta ábyrgðarstarf og vera hluti af þessu mikla verki.

Annar kostur fylgdi einnig þessu starfi: Sá sem sté fótstigin sat á sérstöku sæti gegnt tilkomumiklum steindum glugga sem fegraði framhlið kapellunnar. Þessi steindi gluggi sýndi Fyrstu sýnina, þar sem Joseph Smith kraup í Lundinum helga og horfði til himins og á ljósstólpann.

Meðan sálmar voru sungnir og jafnvel meðan ræður voru fluttar og vitnisburðir gefnir horfði ég oft á þessa mynd af einni helgustu stund veraldarsögunnar. Í huga mér sá ég Joseph taka á móti þekkingu, vitnisburði og guðlegri leiðsögn og verða blessað verkfæri í hendi föður okkar á himnum.

Ég skynjaði sérstakan anda er ég horfði á þessa fögru gluggamynd af trúuðum pilti í helgum lundi sem tók þá djörfu ákvörðun að biðja í einlægni til föður okkar á himnum—föður sem hlustaði og svaraði honum af ástúð.

## Vitni andans

Hér var ég, ungur piltur í Þýskalandi—eftir síðari heimsstyrjöldina, í borg sem var í rústum, í þúsunda mílna fjarlægð frá Palmyra



í Norður-Ameríku og meira en heilli öld eftir að hinn raunverulegi atburður gerðist. Með alheimskrafti heilags anda fann ég í hjarta mér og huga að þetta var sannleikur, að Joseph Smith sá í raun Guð og Jesú Krist og heyrði raddir þeirra. Andi Guðs hughreysti sál mína á þessum unga aldri með fullvissu um raunveruleika þessarar helgu stundar, sem var upphaf að heimshreyfingu sem átti og mun „áfram velta, uns [hún] hefur fyllt alla jörðina“ (K&S 65:2). Ég trúði vitnisburði Josephs Smith um þennan dýrðlega atburð og helgu reynslu í Lundinum helga, og nú á ég fullvissu. Guð hefur enn á ný talað til manna!

Þegar ég lít til baka er ég þakklátur svo mörgum vinum sem hjálpuðu mér á æskuárum mínum að öðlast vitnisburð um hina endurreistu kirkju Jesú Krists. Fyrst trúði ég einfaldlega vitnisburðum þeirra, en síðan hlaut ég guðlegan vitnisburð andans í huga mér og hjarta. Ég tel Joseph Smith meðal þeirra, hverra vitnisburður um Krist hjálpaði mér að rækta minn eigin vitnisburð um frelsarann. Áður en ég gerði mér grein fyrir kennslu andans sem bar mér vitni um að Joseph Smith væri spámaður Guðs, fann hið unga hjarta mitt að hann var vinur Guðs og væri því eðlilega einnig vinur minn. Ég vissi að ég gæti treyst Joseph Smith.

Ritningarnar kenna okkur að andlegar gjafir veitist þeim sem biðja Guð, er elska hann og halda boðorð hans (sjá K&S 46:9).

„Því að allir hljóta ekki sérhverja gjöf, því að gjafirnar eru margar og andi Guðs gefur hverjum manni gjöf.

Sumur er gefin ein og öðrum er gefin önnur, svo að allir njóti góðs af því“ (K&S 46:11–12).

Í dag er mér ljóst að hinn ungi vitnisburður minn naut stórlega góðs af vitnisburði spámansins Josephs Smith og margra vina minna í kirkjunni sem vissu „fyrir heilagan anda . . ., að Jesús Kristur er sonur Guðs og að hann var krossfestur vegna synda heimsins“ (K&S 46:13). Gott fordæmi þeirra, umhyggja og hjálpanði hendur, veittu mér þá blessun að hljóta aðra sérstaka gjöf andans þegar ég þráði meira ljós og sannleika: „Öðrum er gefið að trúa orðum þeirra, svo að þeir megi einnig eiga eilíft líf, séu þeir áfram staðfastir“ (K&S 46:14). Hve dásamleg og dýrmæt gjöf þetta er!

### **Gjöf trúar**

Þegar við sannlega erum auðmjúk munum við blessuð með þessari gjöf, að eiga trú og von um það,

sem eigi er auðið að sjá, en er sannleikur (sjá Alma 32:21). Þegar við gerum tilraun með orð ritninganna og lifandi spámana—jafnvel þótt ekki sé nema löngun til að trúa—og stöndum ekki gegn anda Drottins, mun sálarsvið okkar víkka og skilningur okkar upplýsast (sjá Alma 32:26–28).

Frelsarinn sjálfur útskýrði þessa miskunnsömu reglu greinilega fyrir öllum heiminum í sinni miklu fyrirbæn, ekki aðeins fyrir postulum sínum heldur og öllum heilögum, jafnvel okkur í dag, hvar sem við búum. Hann sagði:

„Ég bið ekki einungis fyrir þessum, heldur og fyrir þeim, sem á mig trúa fyrir orð þeirra,

að allir séu þeir eitt, eins og þú, faðir, ert í mér og ég í þér, svo séu þeir einnig í okkur, til þess að heimurinn *trúi*, að þú hefur sent mig“ (Jóh 17:20–21; skáletur hér).

Þannig blessar fyrsta sýn Josephs Smith líf okkar sjálfra, líf fjölskyldna okkar, og að lokum líf allra manna—við förum að trúa á Jesú Krist fyrir vitnisburð spámansins Josephs Smith. Spámenn og postular í allri mannkynssögunni hafa fengið guðlegar opinberanir svipaðar Josephs. Móse sá Guð augliti til auglitis og lærði að hann var sonur Guðs, „í líkingu [hans] eingetna“ (HDP Móse 1:6). Páll postuli bar vitni um að hinn upprisni Jesú Kristur birtist honum á veginum til Damaskus (sjá Post 26:9–23). Sú reynsla gerði hann að einum af Drottins miklu trúboðum. Hinn voldugi Agrippa konungur hlýddi á vitnisburð Páls um himneska sýn hans við réttarhöldin í Sesareu og sagði: „Þú þykist ekki vera lengi að gjöra mig kristinn“ (Post 26:28).

Og margir aðrir fornir spámenn hafa einnig borið máttugan vitnisburð um Krist. Allar þessar opinberanir, fornar og nýjar, leiða þá sem trúa til hinnar einu guðlegu uppsprettu alls réttlætis og allrar vonar—til Guðs, föður okkar á himnum, og til sonar hans, Jesú Krists.

Guð hefur talað til Josephs Smith í þeim tilgangi að blessa öll börn Guðs með miskunn sinni og elsku, jafnvel á tímum óvissu og öryggisleysis, styrjalda og hernaðartíðinda, náttúruhamfara og eigin hörmunga. Frelsarinn sagði: „Sjá! Armur miskunnar minnar er útréttur til yðar, og ég mun taka á móti hverjum þeim, sem koma vill“ (3 Ne 9:14). Og allir þeir sem þiggja þetta boð munu „umkringdir óviðjafnanlegri gnægð elsku hans“ (Alma 26:15).

Með trú okkar á persónulegan vitnisburð spámansins Josephs og raunveruleika fyrstu sýnarinnar,

með námi og bæn, heitri og einlægri, munum við blessuð með fullvissu um frelsara heimsins, sem talaði til Josephs „að morgunlagi, fagran og heiðskíran dag, snemma vors árið átján hundruð og tuttugu“ (Joseph Smith—Saga 1:14).

Trú á Jesú Krist og vitnisburður um hann og alheims friðþægingu hans er ekki aðeins kenning með mikið guðfræðilegt gildi. Slík trú er alheimsgjöf, dýrðleg fyrir öll menningarsvæði þessa heims, óháð tungumáli, kynþætti, hörundslit, þjóðerni, eða félags- og hagfræðilegum aðstæðum. Rökfærslur má nota til að reyna að skilja þessa gjöf, en þeir sem mest finna áhrif hennar eru þeir sem fúsir eru til að taka á móti blessunum hennar, með því að lifa því hreina lífi sem fylgir vegi sannrar iðrunar og að halda boðorð Guðs.

### **Þakklæti fyrir spámann**

Þegar við minnumst og heiðrum spámanninn Joseph Smith fyllist hjarta mitt af þakklæti til hans. Hann var góður, heiðarlegur, auðmjúkur, skynsamur og hugrakkur piltur með gullhjarta og óhagganlega trú á Guð. Hann var ráðvandur. Sem svar við auðmjúkri bæn hans lukust himnarnir upp á ný. Joseph Smith hafði í raun séð sýn. Hann vissi það, og hann vissi að Guð vissi það, og hann gat ekki neitað því (sjá Joseph Smith—Saga 1:25).

Fyrir starf hans og fórn hef ég nú sannan skilning á föður okkar á himnum, og syni hans, lausnara okkar og frelsara, Jesú Kristi, og ég get fundið kraft heilags anda og vitað um áætlun himnesks föður varðandi okkur, börn hans. Fyrir mér eru þetta vissulega ávextir Fyrstu sýnarinnar.

Ég er þakklátur fyrir að hafa snemma í lífi mínu verið blessaður með einfaldri trú á að Joseph Smith hafi verið spámaður Guðs, að hann sá Guð föðurinn og son hans

Jesú Krist í sýn. Joseph Smith þýddi Mormónsbók fyrir gjöf og kraft Guðs. Hvað eftir annað hef ég fengið staðfestingu á þeim vitnisburði.

Ég ber vitni um að Jesús Kristur lifir sannlega, að hann er Messías. Ég á vitnisburð um að hann er frelsari og lausnari alls mannkyns. Þá vitneskju hlaut ég fyrir hinn ólýsanlega frið og kraft anda Guðs og í huga og hjarta þrái ég að vera hreinn og trúfastur í þjónustu við hann nú og alla tíð.

## **FYRIR HEIMILISKENNARA**

Þegar þið hafið í bænaranda kynnt ykkur boðskap þennan, skuluð þið miðla honum þannig að þeir sem þið kennið séu þátttakendur með ykkur. Nokkur dæmi fara hér á eftir:

1. Syngið sálminn „Fyrsta bæn Josephs Smith“ (*Sálmur*, nr. 10) með fjölskyldunni. Sýnið mynd af Fyrstu sýninni. Biðjið fjölskylduna að tilgreina af hverju myndin er. Lesið fyrsta hluta greinarinnar og ræðið það sem Uchtdorf forseti skynjaði þegar hann virti fyrir sér steinda gluggann af Fyrstu sýninni.

2. Látið fjölskylduna finna þann sannleika um Fyrstu sýnina sem Uchtdorf forseti tilgreinir er þið lesið síðasta hluta greinarinnar með henni. Spyrjið fjölskylduna hverjir henni finnist vera ávextir Fyrstu sýnarinnar. Biðjið fjölskylduna að miðla tilfinningum sínum um Joseph Smith.

3. Lesið frásögn Josephs Smith um Fyrstu sýnina til að búa ykkur undir heimsóknina (sjá Joseph Smith—Saga 1:11–20). Látið yngri börn teikna mynd af Fyrstu sýninni er þið segði söguna um hana. Ræðið þessi orð Uchtdorf forseta: „Guð hefur talað til Josephs Smith í þeim tilgangi að blessa öll börn Guðs með miskunn sinni og elsku.“ Látið börnin útskýra myndirnar sem þau teiknuðu.